

# Yang Yadwang Isinulat Ni JUAN

*Patkaw Ang Pasanag Tung Kumpurming Magbasa*

Atiing timpu pa ni Juan, may mga tumatalig ang pinaeyangan yang Espiritu Santo ta ikaya nirang maayen ang mamagparakawutun yang Matinlung Balita tung mga tau (Efeso 4:11). Purisu namagliliwutun tung duma-rumang lugar ang para mamagparakawutun tung mga tau duun. Kada lugar, kung alimbawa, may mga tumatalig duun, yang mga manigparakawutun ang atia, duun da tung balay nira agpamagdayun. Yang may balay, durung kalelyag nirang magasikasu tung mga bisita nirang atia ay agkawigen nirang mga putul nira tung ni Ginuung Jesus ang ya ra kay nagatuwul na. Dispuis, kung tapus da nganing yang pagparakawutun nira tung sasang lugar, mamagpanaw sing magangay tung dumang lugar. Piru baklu ra papanaway yang may balay, nagapakdulan da nira ta mga kaministiran nirang mamagpanaw (Mga Binuat-buatan 15:3; 3 Juan 5). Ugaring ilem, kumus may dumang mga manigtulduk ta belagan tama ang pamagliliwutun da ka ang para mamagparakawutun da ka natetenged tung pagirintindien nirang atiang mali, ang kaisan duun da ka nagapanaw tung mga tumatalig. Purisu yay pagpakdul ta sasang prublima tung mga tumatalig ang kinawutan da yang mga

manigtulduk ang mga maning tia. Purisu ya ray natengeran na ang ti Juan naisip dang magsulat ang para magpaaman da tung mga tumatalig natetenged tung mga manigtulduk ang atia ang indi ra ilem padayunun nira tung mga balay nira (7-11).

*Yang Intrada Yang Sulat (1-3)*

<sup>1-2</sup> Yuung nagsulat ti Juan ang pinakamaepet tung mga pamagmaepet-epet tani. Yang sulat ang atia, ipinaekelu ra tung nuyung sasang baway asan ang pinilik yang Dios, kasiraanamu ra ka yang mga ana mu.\* Nagamaalamu yeen ta mupia gated parariuitang pagusuy tung kamatuuran ang liit tung Dios. Belagan ilem yuuy pagmaal tung numyu, kung indi, pati yang kumpurming natultul da ka tung kamatuuran ig pagusuy, ya ka, pamagmaal ka tung numyu. Yang nagipagmaal yamen tung numyu ay natetenged ilem tung kamatuuran ang atiang durug kabuila yang apiktar na tung yaten ig ya ra kay paginetegan yang mga isip ta ang asta tung sampa.

<sup>3</sup> Yang gustuu ang yang Dios ang ya ray nagyaring Ama ta durua ni Jesu-Cristong yay paganingen nang Ana Na, padayunanita ra nirang paitaan ta kaneeman nirang makabewereng ang nunut da ka ta kaildaw nira ig

---

\* **1:1-2 1-2** “sasang baway...mga ana mu.” Sasang bitalang pasigem ilem ang para indi ilem maintindian yang mga tau tung lua. Yang linegdangan yang baway, ya ra yang sam pundaan yang mga tumatalig ig yang mga ana na ya ra yang mga tumatalig mismu.

paeyanganita ra ka nira ta paglimengan yang mga isip ta mintras pagpadayunita ra tung pagparanangeren ta tung kamatuuran may tung paggeregmaan tang magpurutul.

*Yang Nagikasadya Enged Yang Isip Ni Juan (4)*

<sup>4</sup> Durug sadya yang isipu atiang nabalitaanu ra ang yang mga pagurubraen yang mga kaarumanan ming duma asan uyun ang pisan tung kamatuuran ang katulad ka tung itinuwul yang Ama tang Dios tung yaten.

*Nagapaprusigir Nang Mamagpadayun Tung Paggeregmaan Nirang Magpurutul (5-6)*

<sup>5</sup> Kapurisu numanyan may sasang nagaingaluku tung numyu asan ang ta yaten ang tanan ang mga tumatalig maggeregmaanita enged ta ustu. Belagan ang maganing ang yang nagisulatung atia sasang baklung katuwulan, kung indi, ya ra kang lagi ay itinuwul yang Dios tung yaten atiang primirung pagtalig ta tung ni Ginuung Jesus.

<sup>6</sup> Maning taa yang kamtangan yang ustung paggeregmaen ang ita magusuy tung kumpurming unu pay nagituwul na tung yaten. Utru si kung papagbilugun ta yang tanan ang nagipanuwul na tung yaten, ya ra ka man taang ipinanggal tung numyu atiang primirung pagtalig mi tung ni Ginuung Jesus ang ya ray dapat ang tumanen ta.

*Nagapaamanan Na Natetenged Tung Mga Mandarayang Pamaglwa (7-11)*

<sup>7</sup> Aganingenamu ra yeen ta maning tia ay natetenged duru rang mga mandarayang namaglua. Yang nagitulduk nira tung mga tau ang ti Jesus unu belagan yang paganingen ang Cristo ig indi ka unu nagingtaung bilug. Kung tinu pay magtulduk ta maning tia yay sasang mandaraya ang pariu ta sistima yang sasang magpakigbatuk tung ni Ginuung Jesus tung uri ang yay magpa Cristo-cristo.

<sup>8</sup> Purisu magbantayamu ta mupia tung mga sarili mi ugud indiamu mawaraan yang pinakabedlayan mi, kung indi, marisibi mi ra ka enged yang maning pa tung sasang primyung nagibaratu yang Dios tung numyu ang andang pisan ay buin na.

<sup>9</sup> Kumpurming tinu pay indi ra pagpadayun tung dating nagitulduk yamen ang mga apustul sigun tung pagkabetang yang paganingen ang Cristo, kung indi, ya rag pasubraay na, asan dag pagpaalawid tung Dios. Piru kumpurming tinu pay pagpadayun tung dating nagitulduk yamen yay pagpakigsasa tung paganingen ang Ama durua yang paganingen ang Ana ang yay paglinukutay tung pagkadios.

<sup>10</sup> Kapurisu kung tinu pay magkawut asan tung numyu ang yang nagitulduk na belagan pariu tung dating nagitulduk yamen tung numyu natetenged tung paganingen ang Cristo, indi mi ra ilem padayunun asan tung mga balay mi. Indi mi ka nganing sapten ang katulad ka tung pagsarapetan tang magpurutul.

<sup>11</sup> Ay kipurki kung tinu pay magsapet tung nira ta maning tia, katimbang nang pagpakigdamay

ra tung pagurubraen nirang atiang malain.

*Yang Pagtapusan Yang Sulat (12-13)*

<sup>12</sup> Maskin duru pa rin ang gustuung ianing tung numyu, tinimbang-timbangu ra tung isipu ang indi ra ilem dayununung ipabtang tung sulat ang atia, kung indi, dakulung sarigu ang mangayaw ka enged asan tung numyu ugud mageremetanita rang magkeresen ugud asan da maging bugus yang kasadyaan tang tanan.

<sup>13</sup> Yang tanan ang mga kinasakpan yang sam pundaan tani ang pinagpilik da ka yang Dios ang katulad ka tung numyu pamagpakikumusta tung numyung sam pundaan asan.

*Ya ra ilem tia ay masulatu tung numyu,*

*Juan ang paganingen ang pagmaepet-epet*

**Yang Baklung Ipinagpakigpaigu  
New Testament in Tagbanwa, Calamian**

copyright © 2008 Wycliffe Bible Translators, Inc.

Language: (Tagbanwa, Calamian)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 18 Apr 2025 from source  
files dated 29 Jan 2022

7b428e71-b1e3-505c-8d33-c172c24b2fcd